




Sarah-Quita a bolbe domina durante e Pegasus Airlines PWA den competencia di slalom



ORANJESTAD (AAN)--- Na e costa occidental den e provincia Izmir (antes Smyrna) den e distrito Cesme e ciudad Alaçati ta localisa cu ta especificamente destina pa practica e deporte di windsurf. Cesme ta e region na unda e Jet Set di Istanbul y Izmir ta pasa vakantie

Aki ta unda desde año 2009 Sarah-Quita ta competi den e disciplina di slalom. E anja aki ta di 7 biaha e ta competi ey y a titula campeon pa di tres año sigui di e evento aki. E evento aki ta e di dos competencia di Slalom di PWA pa 2014 cu ta conta cu un total di 4 cu posibilidad di salta un pa por conquista e titulo di campeon mundial. E promer evento na Turkmenistan no a conta cu presencia di SQ pa motibo di tabata tin otro compromiso.

Durante 6 dia, desde 26 di aug - 31 aug, SQ a midi forza cu 22 otro regatista femenino di rond mundo Promer cu yega den e final di cada eliminacion mester clasifica promer despues pasa pa semi-

final y siguiementamente pa e final.

Desde e promer eliminacion Sarah-Quita ta domina e caredanan den division femenino. SQ a pusta sin misericordia y a laga su oponentenen miyas tras di dje cada biaha cu excepcion di eliminacion 5 unda ela cambia su equipo pa motibo di biento fuerte cu a resulta di ta menos fuerte durante di e careda y ela crusa e finish den tercer lugar.

Den e di ocho eliminacion e tabata full off cu su timing y a yega laat na e salida hasta cu e ta den di nueve lugar na e promer buoy sin embargo ela recupera batayando fuerte pa termina na di cinco lugar. Danki na e pifia aki di SQ e regatista Turco Lena Erdil por a celebra su promer Victoria eliminatorio desde Aruba na 2011 pa deleite di e spectadornan Turco. Un total di 9 eliminacion a keda completa di cual 7 Sarah-Quita a logra di termina na promer lugar.

Fuera di titula campeon di slalom Sarah-Quita a stablece e record di velocidad cu 61 Km/h birando asina e regatista femenino mas veloz di e asina yama "speed challenge". Ya pa basta tempo no tabata tin duda di SQ su velocidad pero cu ayudo di e sistema di GPS esaki a keda registra oficialmente durante e evento aki.

Remarcable tabata e diferencia den habilidad entre SQ y e demas regatistanan femenino. E bentaha di SQ ta cu e ta calcula su salida cu precision y ta accelera rapido manehando su tabla y vela cu habilidad den cada lorada. Durante e ceremonia di premiacion SQ a yama Jordy Vonk un regatista Hulandes di apenas 21 año inmensamente danki di a sponsor e cu velanan extra di su mes, y a prove'e SQ e oportunidad di competi. E siguiente eventonan di Slalom ta na Francia y New Caledonia y si e por keda cu e velanan e tin planea pa participa aya. Den e caso ey, posiblemente eliminando e competencia cu el a falta na Turkmenistan e por purba su suerte pa logra titula campeon mundial. Pa año 2014 e no tin sponsor di vela cu ta hasi e asunto complica pa competi den tur disciplina manera el a propone pa su mes. Danki na Dios y su provision ela logra te awor aki pa realisa su meta.